

## 2 तीमुथियुस

**1** पौलुस की तरफ ते जइसन की उइ अपनी जिन्दगानी मा किरिया खाइन रहै, जउन मसीह यीसु है, उइ परमेसुर की इच्छा ते मसीह यीसु के परेरित है।

<sup>2</sup>पियारे बेटा तीमुथियुस केर नाम, परमेसुर बाप अउर हमरे परभु मसीह यीसु की तरफ ते तुमका अनुग्रह अउर दया अउर सान्ती मिलत रहै।

### बिसवासु खातीन परोतसाहन

<sup>3</sup>जउन परमेसुर की सेवा हम अपने बाप दादन की रीत केर तना सुद्ध विवेक ते करित है; ऊ का धन्यवादु करित है। <sup>4</sup>अउर तुमरे आंसू की सुधि करिके रात—दिन तुमसे भेंट करे केर खातिर लालसा राखित है कि खुसी ते भर जाई। <sup>5</sup>अउर हमका तुम्हरे उइ पाप रहित बिसवासु की सुधि आवति है कि जउन पहिले तुम्हरी नानी लूइस, अउर तुम्हरी माई यूनीके मा रहै। अउर हमका यू तय है कि तुमहूँ मा है। <sup>6</sup>यही बरै हम तुमका याद कराइत है, कि तुम परमेसुर केर उइ बरदान का जो हमरे हाथ रखै ते परमेसुर की तरफ ते तुमका मिला है चमकाय देओ। <sup>7</sup>काहे ते कि परमेसुर हमका उर केर नाहि मुला सामरथ, अउर परेम, अउर सयम केर आतमा दीन है।

<sup>8</sup>यहि कारन परभु की गवाही ते, अउर हम जिनके कैदी हन लज्जित न होय। पर ऊ परमेसुर की सामरथ केर जरिये सुसमाचारु केर खातिर हमरे साथय दुख उठाव। <sup>9</sup>जउन हमार उद्धार कीन्हेसि अउर पवित्र बुलउआ दै केर बुलाइन अउर इ हमरे कामन केर खातिर नाहीं, पर अपन मनसा अउर ऊ अनुग्रह केर जरिये है जउन मसीह यीसु मा सनातन ते हमरे ऊपर हुआ है। <sup>10</sup>मुला अब हमरे उद्धारकरता मसीह यीसु केर परगट होय केर बरे उजियार भवा। जउन मिरतु का नास किहिन। अउर जीवन अउर अमरता का ऊ सुसमाचारु दैके उजियार कइ दिहिन। <sup>11</sup>जेहिके खातिर हम उपदेस दे वाले, अउर परेरित, अउर उपदेसक

ठहराये गएन। <sup>12</sup>जेहिके कारन हम, दुख उठाइत है मुला लज्जित नाई होइत हैं। काहे ते हम उनका परतीत कीन्हेन है उनका जानित है, अउर हमका निस्चय है कि उइ हमार थाती केर उइ दिनन तक रखवाली कर सकत है।

<sup>13</sup>जउन खरी बातें तुम हमते सुने हैं ओहि पर बिसवासु अउर परेम केर साथ जउन मसीह यीसु मा है आपन साथ देये वाला बनायके राखेव। <sup>14</sup>अउर पवित्र आतमा करिये जउन हमरे भीतर बास करत है उइ अच्छी पाती की रखवारी करिहै।

<sup>15</sup>तू जानत है कि आसिया वाले सब हमते फिर गये हैं। जीमा फुगिलुस अउर हिरमुगिनेस है।

<sup>16</sup>उनेसिफुरुस केर घराने पर परभु दया करै, काहे ते उइ बहुत बार हमरे जी का ठन्डा किहिन, अउर हमरी जंजीरन ते लज्जित नाहीं भए। <sup>17</sup>मुला जब उई रोमा मा आए तो बड़े जतन ते खोज कर हमते भेंट किहिन। <sup>18</sup>परभु करै कि उइ दिन ओहिके ऊपर परभु की किरपा होय अउर जउन जउन सेवा उइ इफिसुस मा किहिन है ओहिका तुम नीक नीक जानत हौ।

**2**ई बदे हे हमार पूत, तुम ओहिके किरपा ते जउन मसीह यीसु मा है, बलवन्त होय जाओ।

<sup>2</sup>जउन जउन बातें तुम बहुतन गवाहन केर समुहे हमते सुने हौ, ओहिका बिसवासी मनइन का सौंप देओ, जउन अउरन का भी सिखावै जोग है। <sup>3</sup>मसीह यीसु केर अच्छे जोधा की तना हमरे साथ दुख झेलौ।

<sup>4</sup>जब कउनउ जोधा लड़ाई पर जात है तो ई बदे कि अपने भरती करै वाले का परसन्न राखे, अपने का ई दुनियां केर झमेला मा ना फांसै। <sup>5</sup>फिर अखाड़ा मा लड़ै वाला मनई विधि ते न लड़ै तो उइके मुकुट नाहीं पहिरावा जात है। <sup>6</sup>जउन गृहस्थ फिर मेहनत करत है, फल केर अस पहिले ओहिका मिलै का चाही।

<sup>7</sup>जउन हम कहित है, उहि पर जिउ लगावौ, अउर परभु तुमका सब बातन की समझ देहै।

१४यीसु मसीह का सुमिरन करौ, जउन दाउद केर कुल मा जनम लिहिन। अउर मरै भए लोगन मा जी उठे। १५जी तरह हम कुकरमी की तरह दुख उठाइत हैं, हियन तक कि कैद मा हन; मुला परमेसुर केर वचन कैद मा नाहीं है। १६ई मारे हम चुने गएन लोगन केर खातिर हम सब कुछ सहित है, कि उनहूँ उइ उद्धार का जउन यीसु मसीह मा है अनन्त महिमा केर साथै पावैं।

१७ई बात सांचु है, कि अगर हम उनके साथ मर गएन तौ उनहीं केर साथ जियब भी। १८अगर हम धीरज ते सब कुछ सहब तौ उनके साथ राज भी करबु, अगर हम उहिका इन्कार करित हैं तो वहु हमका नकार देयी। १९अगर हमार विसवासु ना भी होय तबौ ऊ विसवासु केर जोग बने रहत है। काहे ते उइ अपने आप का इन्कार नहीं कर सकत है।

#### कामु दुआरा परमेसुर केर अनुमोदन

१४ई बातन की सुधि उनका करि देओ, अउर परभु केर समूहे चेताए देओ, कि सबदन पर बहिस न करै, वरन सुनै कउनउ फायदा नाहीं है, सुनै वाले बिगड़ जात है। १५अपने आप का परमेसुर का गरहन जोग, अउर अइसा काम करै वाला ठहराए का जतन करौ जेहि केर खातिर लज्जत न होय का पड़े। अउर जउन सांचु बचन का ठीक तरह ते काम मा लावत होए। १६पर बेकार बकवाद ते बचे रहौ, काहे ते अइसे लोग अउरौ अभकती मा बइठ जात है। १७अउर उनका बचन सड़े घाव की तरह फइलत जात है, हुमिनुयुस अउर फिलेतुस उनहिन मा है। १८जउन ई कहिके कि उनका फिरते जनम होय चुका है उइ सांच बात ते भटक गए हैं। अउर कितने लोगन केर विसवासु का उलट—पलट दिहिन है। १९फिरौ परमेसुर की पक्की नींव बनी रहत है, अउर ओहि पर ई छाप लाग है कि परभु अपनेन का पहिचानत है, अउर जो कोऊ परभु का नाव लेत है ऊ अधरम ते बचा रहत है।

२०बड़े घरन मा न खाली सोना—चांदी केर बरतन होत है मुला काठ अउर माटी केर बरतनौ होत है, कउनो कउनो इज्जत केर अउर कउनो कउनो बेइज्जत केर खातिर। २१अगर कउनो अपने आप का इन ते सुद्ध करिहै तो ऊ अन्दर केर बरतन अउर पवित्र ठहरी; अउर मालिक केर कामे आई अउर हर भले काम केर खातिर तइयार होई।

२२जवानी की इच्छा ते भागौ, अउर जउन साफ मन ते परभु का नाव लेत हैं। उनके साथ धरम, अउर विसवासु अउर पियरे, अउर मेल मिलाप का पीछा

करौ। २३पर मूरखता, अउर अविद्या केर झमेले ते अलग रहौ, काहे ते कि तू जानत है कि उनसे झगड़ा होत है। २४अउर परभु केर दास का झगरारू नाहीं होय क चाही, सबन केर साथ मुलायमियत अउर सिच्छा मा जोग, अउर बरदास्त करै वाला होय। २५अउर विरोध करै वाले का सहारे ते समझावै, का जाने परमेसुर उनकेर मन बदल दे। कि उनहूँ सांच का पहिचाने। २६ई केर जरिए ओहिकी इच्छा पूरी करै केर बारे सचेत रहिके सैतान केर फन्दा ते छूट जाए।

#### आखीर दिनन मा अधरम

३ पर यू जाने रहौ, कि आखिरी दिनन मा कठिन समय अइहैं। २काहे ते मनई अपसुआरथी, लालची, डींगमार, घमंडी, बुसई करे वाले माइ—बाप का कहा न माने वाले किरतहब, गंदे। ३माया मा न फंसे वाले, छमा न करने वाले, बुराई करै वाले, संयम न करै वाले, कठोर, भले केर बैरी। ४बिसवासघाती, दीढ़ घमंडी, अउर परमेसुर केर नाहीं मुला सुख—विलास केर चाहे वाले होइ हैं। ५उई भगतन केर वेस धरी है पर परमेसुर की ताकत का नाहीं मनि है, अइसे लोगन ते दूर रहै का चाहीं।

६इनहिन मा ते वहु लोग है जउन दबे पांव घरन मा घुसि आवत है, अउर छिछोरी औरतन का बस मा कर लेत हैं, जउन पाप ते दबी अउर हर तना ते अपनी इच्छा केर बस मा है। ७अउर हमेसा सीखत तो रहत है, पर सच केर पहचानु तक कबहौ नाहीं पहुंचत हय। ८अउर जइसे यन्नेस अउर यम्ब्रेस ने मूसा केर विरोध किहिन रहै, वही तना यहू सच्चाई का विरोध करत है। ई लोग तो अइसन मनई हैं जिनकी बुद्धि नस्ट होइ गई है। उइ विसवासु केर बारे मा निकम्मे होइ गए हैं। ९मुला उइ इह ते आगे नाहीं बढ़ सकत, काहे ते उनकी मूरखता सब लोग जानिगे हैं, वइसन इनहूँ केर हो जइहैं।

#### पौलुस तीमथी को कार्यभार दीन रहब

१०मुला तुम उपदेस चाल चलन, मनसा, विसवासु, सहे की ताकत, परेम, धीरज अउर सताए जाए पर अउर दुख उठावे मा हमार साथ दिए हैं। ११अउर अइसे दुख मा भी जउन अन्त किया अउर इकुनियम अउर लुस्त्रा मा हमरे ऊपर पड़े रहै। औरन दुखना मा भी, जउन जउन हम उठाय रहन, मुला परभु ने हमाक उइ सबन ते छोड़ाय लिहिस हय। १२पर जिनते मसीह यीसु मा भगती केर साथ जीवन बितावा चाहत है उइ सब सताए जइहैं। १३अउर दुस्त अउर

बहकावे वाले धोखा दे वाले, धोखा खात भए बिगड़त चले जइहैं।<sup>14</sup>पर इन बातन का जउन तुम सीख लिहे हौ अउर परतीत कर लिहे हौ ई जानकर मजबूत बने रहौ कि तुम उनहिन का किन लोगन ते सीखे हौ।<sup>15</sup>अउर बालकपन ते पवित्र सास्त्र तोहार जाना बूझा है, जउन तुमका मसीह पर विसवासु करै केर उद्धारु पावै खातिर बुद्धिमान बनाय सकत है।<sup>16</sup>हर एकु पवित्रसास्त्र परमेसुर केर परेना ते रचा गवा है, अउर उपदेस, अउर समझावै, अउर सुधारै, अउर धरम केर सिच्छा केर खातिर फायदे केर लिए है।<sup>17</sup>काहे ते परमेसुर केर जन सिद्ध बनै, अउर हर एकु भले काम केर खातिर तइयार रहे।

**4**परमेसुर अउर मसीह यीसु का गवाह करिके जो जियते अउर मरे हुए लोगन का न्याय करिहैं उहिके अउर ऊ केर परगट होय, अउर राज की सुधि कराय केर तुमका चेताय दीन है।<sup>2</sup>कि तुम बचन का परचार करौ, समय अउर असमय तइयार रहौ, सब तरह ते सहे की ताकत, अउर सिच्छा केर साथइ उलाहना देव अउर डाटौ अउर समझावौ।<sup>3</sup>काहे ते की एक बखत अइसने आई कि लोग खरा उपदेस नाहीं सहि पइहैं। अउर पर कानन केर खजुरी मारे काम मा खजुरी केर मारे आपन इच्छा केर मुताबिक अपने खातिर बहुतै उपदेस देय वालेन बटोर लेहैं।<sup>4</sup>अउर अपने कान सच्चाई ते अलग किस्सा कहानिन मा लगइहैं।<sup>5</sup>मुला तुम ई सब बातन ते हुसियार रहिके, दुख उठायो। सुसमाचार परचार का काम करौ, अउर अपन सेवा का पूरी करो।

<sup>6</sup>काहे कि अब हम अर्थ केर तरह उड़ेले जाइत है, अउर हमरे कूच करै का बखत आय—गवा है।<sup>7</sup>हम अच्छी कुस्ती लड़ चुके हन, हम अपन दौड़ पूरी कर चुकेन है, हमने विसवासु केर रखवाली कीन है।<sup>8</sup>अउर आगे आवै वाले समय मा हमरे खातिर धरम केर मुकुट रखा है जेहिका जितना परभु, जउन धरमी, अउर निभाउ करै वाले है, हमका उइ दिन अउर हमका ही नाहीं अउर उइ सबन का देहैं जो उनके

परगट होय का पिरय जानत है।

### पौलुस केर बयान

<sup>9</sup>हमरे पास जल्दी आवे की कोसिस करौ।<sup>10</sup>काहे ते देमास ई संसार का पियारा जान केर मोहिका छोड़ दिहिस। अउर थिस्सलुनी को चला गवा। अउर क्रैमथेस गलतिया को अउर तीतुस दलमतिया को चला गवा।<sup>11</sup>खाली लूका हमरे साथ है: मरकुस का लइके चले आव; काहे ते सेवा करै केर खातिर वह हमरे बड़े काम का है।<sup>12</sup>तुखिकुस का हम इफीसुस भेजेन है।<sup>13</sup>जउन बांगा हम त्रीआस मा करयुस केर हियो छोड़ आयन है, जब तुम आयो तो ऊ का अउर किताब खासकर जउन चमड़ा केर पत्तर पर लिखि है लेत आयो।

<sup>14</sup>सिकन्दर ठठेरा हमते बहुत बुराई किहिस है परभु ओहिका ऊके काम केर बदे बला देहैं।<sup>15</sup>तुमहू ओही ते सावधान रहौ। काहे ते ऊ हमरी बातन का बड़ा विरोध किहिस रहे।

<sup>16</sup>हमरे पहिले जवाब मा हमार कोऊ साथ नाहीं दिहिस रहे, वरन सब हमका छोड़ दिहिन रहे, भला होय जो ई बात का उन का लेखा जोखा न देक पड़े।<sup>17</sup>मुला परभु हमार सहायक रहे, अउर हमका समर्थ दिहिन जी ते हमरे जरिए पूरा—पूरा परचार होय (अगर सब तरह की जाति सुनि ले, अउर हम तो सेर केर मुंह ते छुड़ाय गयेन हन)।<sup>18</sup>अउर परभु हमका हर एक बुरे काम ते छुड़ाई, अउर अपने सरग केर राज मा उद्धार करके पहुंचाई। ओही की महिमा जुग—जुग तक बोयी जाई। आमीन।

### आखरी वचन

<sup>19</sup>प्रिंस का अउर अक्विला का, अउर उनेसिफरुस केर घराने का परनाम।<sup>20</sup>इरास्तुस करिन्युस मा रह गवा। अउर त्रिफियुस का हम मीलैतुस मा बीमार छोड़ आएन हैं।<sup>21</sup>जाड़ा ते पहिले चले आवे की कोसिस किहो; यूबूलुस, अउर पूदेस अउर लुनुस अउर क्लौदिया अउर सब भाइन का तोहिका परनाम।<sup>22</sup>परभु तुम्हारी आतमा केर साथे रहे; तुम पर किरपा बनी रहे।